


豐順街九號



**“In an increasingly complex world,
sometimes old questions require new answers.”**

豐順街九號究竟是什麼來的

我們就是一群廢青聚在一起辦的非官方學生報，主要讀者群原本為中三或以上的同學，題材包含社會、政治、音樂、歷史、軍事、電影、打機、搵食什麼什麼的，是非法的，也就意味着會被沒收，請大家收埋啊求吓大家啊。今次呢份係我哋特登為今年中一新加入我們培英的同學而製作的，中一同學新黎人生路不熟，作為學生報當然要為大家着想，盡快適應這裏的生活。今次這份號外，主要為同學解決一些最迫切的問題，也就是如何「搵食」同開學注意。

各位同學相信起暑假嘅適應班，又或者係 Ocamp 應該識到幾個同學仔，又或者稍微嘗到

中學讀書的滋味。小編當年中一嗰陣都上過啲英文班，以為咁樣可以好好咁適應到中學生活，但係上完之後都係覺得好迷惘，因為小編我當年 lunch time 搶唔到位食飯（仲有其他諸多問題），所以我哋今次就為大家提供一啲非常實際而有用嘅攻略。

今次呢個系列嘅 orientation book 講啲咩？我哋呢班禾輦老鬼會介紹搵食入門，開學注意，搵平嘢掃貨，校園生活乜乜乜，相信好多實際問題我地都包辦得到。下面係我地嘅聯絡方法，對正刊（文史哲社經政，音樂、電影、打機、戰爭、軍武）有興趣嘅同學可以訂閱，完全免費！

INSTAGRAM : fungshunstreetno9

FACEBOOK 豐順街九號 <https://www.facebook.com/fss9pyc> (subscribe here)

EMAIL : fungshunstreetno9@gmail.com



大排檔組團

大排檔通常都最易搵位，波記同富榮當然係不二之選。前者通常食車仔麵，碟頭飯就當場自取，價錢 30 至 40 蚊，中肯得來又大大碟，你去多幾次同老闆熟嘅話，仲可以免費多舊肉食下，不過野食嘅選擇就唔多。但係夏天太熱或者潮濕落雨，就唔建議去波記坐，坐都坐得唔舒服。

富榮相對波記黎比較，碟飯就細碟啲，但係水吧簡直就是一流。碟頭飯加紅豆冰只係兩元，抵到唔抵，仲要香過其他地方嘅紅豆冰。另外富榮嘅凍檸茶，無論係茶香定係檸檬嘅新鮮，又或者檸檬茶嘅澀味，都值得一飲再飲，所以食富榮係為水吧的。一碟飯價錢就 34 元。(未計野飲)(呢個時代方咩 2 字頭價錢嘅飯)，怕爭唔到到可以去以上兩間大排檔囉。

陳根記大排檔經濟又實惠，29 元食碟飯送野飲，特別肚餓可以買點心加餸，啲員工態度不錯，熱心動力。陳根記座位眾多，容易搵位之餘，夏天都有大風扇吹涼風，唔會擠擁又好坐。唯一缺點就是陳根記人客多，會令到廚房未必能夠應付，有時候等一碟飯浪費了小編我九個字的時間，飯來到之後又要狼吞虎嚥怕遲到，所以同學一定要睇時間做人。不過如果同學向員工催促，佢地會真的為你跟進，所以陳根記是個不俗的選擇。

街市好選擇 (全部都耍外賣) 智恆燒臘對面 美美蔬果轉彎

Tea plus 最好就係有冷烏冬食，仲有拉麵，章魚燒乜乜乜，各類特飲 (珍珠奶茶個啲呢) 都係去 tea plus 買好。但切記那裏的南瓜餅是伏，只是一舊炸了的麵粉，熱氣得黎唔好食，仲有十元三件，性價比頗低。但係 tea plus 最重要的一項，就是通常女仔都鍾意呢間，可能貪佢份量唔係好大之餘又可以食啲比較特別嘅野 (咁有唔少女仔唔會成個男人咁整碟飯凍奶茶嫁)，所以男同學要注意了。

禾肇小食係最平最抵之一嘅鋪頭，尤其係 5 元腸粉，係人都狗衝去食，價錢平到唔平，性價比超高。另一間類似賣小食嘅鋪頭叫做食記，芝士腸撈麵乜乜乜都幾平，仲有煎釀三寶魚蛋燒賣，放學之後去填下肚都得。

金潮泰價錢由 25 到 30 元，賣嘅都係泰式粉麵，去買粉食可以自己加料，一定要多河粉。小編私人介紹豬頸肉冬蔸公，口感特別好咬口。但係金潮泰就唔包野飲，所以要去士多自購。金潮泰隔離有一間客家小食，一盒三餸飯只需 \$30 樓下。質素唔可以話頂級，起碼白飯唔會一舊野溶埋一齊，餸菜唔會得舊骨而冇肉，所以不失為經濟嘅選擇。

商場搵食之道

有同學介紹新開嘅媽咪雞蛋仔比各位同學，就係商場樓梯 (近學校) 一上到去就係，極力推薦朱古力味。「真係超好食超好食同超好食」就係一位學姐的評價，但係又有人話禾肇呢間比起旺角出面啲質素差好多，唔好諗咁多，狗衝去試下啦！

銀咖哩位於商場地下，Aeon 對開就係，同學可以穿過商場去到馬會隔離由電梯落去，又或者地由街市士多一路直行穿過去，再經 7 仔入番商場就得嫁啦。銀咖哩 (應該好多人食過) 最好就當然係可以自己落單配搭加料，自己研究最低食法，另外檯面上嘅配料都係可以任倒的，做學生係要市儉啲。銀咖哩啲飯大大碟得黎，而且又有炸豬扒、蛋包飯乜乜乜，仲可以瘋狂食芝士，比 Aeon 入面嘅外賣飯盒好得多。

意樂位於商場較深處，商場樓梯 (近學校) 由媽咪雞蛋仔一路向前直去，經過不同金__食店，經過美食軒同一系列鞋鋪轉右，就會見到嫁啦。意樂主係西式飯食，都有意粉同湯麵，學生餐質素平平，當然貴一點的 (最少大概 40 大元) 就比較好。小編覺得那兒的「」香噴噴，每次去通常都是叫這個，但是那兒的樓面經常扮睇唔到學生，而且都唔會主動耐水。意樂最大壞處就係好多人等位，一般都難等得到入座，入到去仲博到有樓面落單，仲要等食，高風險隨時都會遲到，未熟路唔建議挑戰。



伏食/劣食系列

橫濱係禾肇第一大劣食，位於媽咪雞蛋仔和 M 記附近，價錢大概最少 35 元以上。碟頭飯凍冰冰（飯冰冰 lol），水吧嘅奶茶又淡而且口感奇差，份量細到食個 M 記包仲飽，食物淡而無味，不知煮完放左起度幾耐 下刪五千字。性價比奇低，若果同學想摧毀自己那天的心情，那麼果斷去吧，小編心靈上支持各位。罷食橫濱！罷食橫濱！

金時是學生，這兒強調係學生，全部都唔適宜去食。一黎那都是老師組大團的地方，這個不解釋，大家都應該唔會樂於同成班老師坐隔離飯枱，食都食得唔自然。第二就係因為金時員工對學生態度奇差，面對成人顧客就笑笑口好聲好氣，面對我們這群弱勢社群就凶神惡煞。餐具，茶壺，碗碟全部都大大聲咁 "dum" 上張檯，送糖水會唔耐煩催促學生快快手擺，有時有啲會發脾氣搞到食個飯都無安寧，中一新同學請謹慎考慮。若果考慮金時嘅食物質素，大部份都唔係即叫即整。炒粉麵冇乜鑊氣，食鹽焗雞飯就睇你好唔好彩，炒飯不是炒的（是基本吧），份量都尚算足夠。學生餐價錢大概 \$ 30，但係金時唔提供嘢飲，只有茶水同糖水，就睇同學如何取捨啦。

金禾，都是在金字頭食店那一條街，學生餐一碟飯成 40 大元，配料餸菜比其他鋪頭少，質素平平但是價錢貴。金禾幾年前聞名於有甲由。蘋果新聞 2011 年 5 月 13 日報導「食蛋治送原隻甲由！有主婦在沙田禾肇老牌茶餐廳進食三文治，剛咬了一口，再食第二咬之際，駭然發現幾乎放入口的雞蛋上，躺着一隻完好的甲由屍體。事主嚇得毛骨悚然衝入廁狂嘔。她向餐廳投訴反遭收銀員奚落，表示食物有甲由「好平常」，毋須大驚小怪。」並說「睇你（食客）好唔好彩遇唔遇到。」所以同學要三思喔。

順德經典，就位於金仔對面，美心西餅隔離，又係一個老師集中地，都是不解釋，食都唔自在。有同學分享，順德經典會未煮熟都送上，一間正常的食店也不會淪落到這樣的質素吧。小編去過順德經典幾次，學生餐加幾蚊就可以有甜品，有一次小編挑戰那兒的桂花糕時，是幾乎沒有桂花香的。有一位學姐分享過，話順德經典有一個蘑菇形狀嘅包，入面餡料就係蘑菇，面層有一層朱古力粉，相信同學已經想像到有幾「伏」。

開學注意 Q and A

學校有咩食飯嘅地方？

除左成日冇位嘅 canteen 之外，中一同學可以去新翼操場食飯，又或者好好咁用下中一嘅特權，起班房食飯。班房食飯一向都係得中一同學先可以咁做，較高年級嘅同學一直都想爭取，聽聞學生會未來有望而且唔排除爭取到開放多幾間班房食飯，所以中一同學要珍惜好個權利喔。

究竟中學生 pe 堂買咩鞋呢？小學時候買鞋係買純白色嘅運動鞋，中學唔同嘅地方就係比較寬鬆，只要運動鞋的主調係白色就得啦。如果運動鞋冇花紋（其他顏色），主色係白色都沒有問題。

究竟 pe 堂有咩要知呢？體育堂就會係兩班一齊上，例如可能 AB 兩班一齊，每節課堂時間 55 分鐘，但係好可憐地上堂前要落地下 changing room（人稱清蒸 room）集合，排隊規規矩矩先至會開始，所以一般都會曬唔少時間。如果同學想最大化利用課堂時間，唯一可行之計就是聽黃 Sir 或者 miss woo 講啦。中學嘅 PE 堂內容就等同學未來幾年自己發掘，但係當中一件全同學最痛苦的事——繞校長跑。詳細規則老師遲啲會同大家講，但係同學要有心理準備，長跑距離最少有幾公里，一年原定六次，夏日炎炎跑簡直就是自殘，小編我已經就係咁自殘左幾年。（雖然大部分都係行唔係跑，hea 左佢算啦）

有咩校規特別注意？學校校規大部份都沒有什麼特別，但是最重要要注意的一項就是班房不可以食嘢，雖然高年級嘅同學都（包括小編）會偷運小食部嘅野食上班房。同學一定要記得班房是不可以飲野的（冇糖份那些）同食嘢嘅，如果同學無視該規條的話，可以嘗試神不知鬼不覺咁走私野食上班房，編輯部絕無教唆同學犯規之意，只係提醒同學要執生姐。

英文上課會否特別辛苦？其實英文上課並不會有特別大嘅困難，可能最初入學個陣會見到好多唔識嘅英文生字，但是只要最初幾個月努力查吓字典同學習，其實就可以短時間之內增進大量日常會用嘅詞彙。但係若果只能理解或運用這些日常用字，英文程度都是不足夠的。香港雖為國際都會，但是其實很多人的英文嚴重受中式語法影響，同學就讀這間英文中學的時候，雖然「生存」並不困難，但是若想更上一層樓或者真的學好英文，非要靠睇書睇電影各類嘅自學。同學新升上中學，多左一啲以往不會接觸的科目，地理、科學、歷史呢啲都會用英文上課，當然地同學是中一學生老師應該會有時候用中文支援同學理解，地理和科學會有一些專業詞彙需要記住，同學加油啊！

中一我是咪可以 hea？

老老實實講中一和中二係最悠閒的兩年，沒有特別多的課外活動，更沒有特別多的測驗，功課和不同嘅評核數量都較少，唔洗面對中三的選科壓力和高中的 DSE 三年戰爭。但是咁都唔代表同學可以放棄治療，小編自初中起荒廢了一段很長時間的數學，依家中五 maths 就食曬屎，真係惡夢，所以依家高中就要「超英趕美」咁追上進度，前車之鑒啊。所以中一同學這兩年比較悠閒，應該要努力學習，要打好基礎，不單只係看教科書，很多課外書都係值得讀。正所謂中一老資歷洪老師班主任成日都用呢句提醒同學，「腹有詩書氣自華」，不論四書五經，各項文學小說，歷史社政，當然除咗文史哲，科學同數學同學都可以自學嫁。

培英假期如何？

培英假期出名少，少到令人不禁懷疑究竟假期日數究竟夠唔夠法定數量。培英假期少這個問題一年又一年嘅學生都抱怨過，同學去到咩咩咩聖誕假，農曆新年嘅時候，好多時我地培英人都可以包車。其他學校的學生準備迎接聖誕節來臨時，我們還在學校聽老師喋喋不休，好鬼長氣咁交代有關聖誕假後考試嘅問題，這是何等的悲傷！但係新同學你地好彩啦，今年起假期日數好似比以往多番啲，姐係多左幾日比我地做廢青，諗起都有啲興奮。

新校長怎麼樣呢？

現在的新校長以往是教高中經濟科的，內容主要是來自 adam smith 和新自由主義。新官上任三把火，新校長上任之後，就目前編輯部已知而且同學開學已經知道的，就是以後每一節課老師都會檢查校服儀容，而且未來圖書館遲還書的發展會比以往升三倍。對於小編這些總是渴望把書據為己有而且十年也不還書的人，這簡直又係惡夢。相信校長會是一個傾向法家的思想的人，着重秩序。(與編輯部的無政府主義傾向有衝突)，一系列其實係老調子嘅「校規」今年重題。上任就已經強力維持學校秩序，連飲咗水都問，其實已經同透啖氣都要申請差唔多，真係曬氣 lol。

學校設施

學校近年嘅工程包括天台花園(名字大家都忘記了)、演講廳(changing room 對面)(成了垃圾房)、編輯部聽聞花費百萬嘅校史館，據說是世界各地的培英傳統，以及編輯部覺得最正嘅食堂冷氣加設工程，因為第一世界嘅人有冷氣會死啊。而且，培英另外一樣揚名於其他學校的就是培英在走廊和不同地方都放設了大量沙發，同學不用害羞，像小編這些老鬼已經會很豪邁的享受，這又係一項實際難得的設施，大家盡情坐啦。

有學習問題怎麼辦？

地下走廊教員室外同學應該都見到有大量沙發，放學之後個度就是師生坐而論道的地方，培英老師其實都樂意同學主動提問，而且會樂意協助，即使係冇任教你嘅老師都會願意抽空解難。但是唯一要注意的就是到教員室尋找老師協助時，要對住門口個咪，用英文請老師出黎。可能同學初入學會洩底，但係講多幾次自然就會「唔知醜」嚟。

放學除返返屋企，可以有咩做？

既然做得中學生，當然就可以放學之後周圍行下。每逢星期三下晝，jusco/aeon 會有特價團，例如 \$3 一包薯片、\$20 樓下買餃子乜乜乜。又或者放學後同學可以去打波，老師會到五點半清場，排球籃球都可以隨意玩。同學也可以參加一些校隊或者學會，足球隊近年新開，同學可以搵李鍵豪老師報名，又或者去棋藝學會捉棋，又或者可以香港文化生態學會跟洪老師見識多些大自然乜乜乜。總之中學生活一定比小學多姿多彩，記得中一應該會有一個一人一樂器的全年活動，同學可以趁這個機會充實一下自己的音樂學習，話唔定未來可以用來追女仔添，所以男同學們努力。

培英旅行係點樣？

培英學校旅行就以級社黎分，每級去嘅地方都唔同，通常學校都會好 hea 咁每屆級社每年去嘅地方都一樣。中學學校旅行其實同小學分別唔大，花費十年嘅集合、上車、等、訓、訓同埋訓，到左目的地 hea 足幾粒鐘跟住又重複上面程序，所以小編已經冇咁期待了。

培英水運會同陸運會點樣？

香港培英同沙田培英會合辦水運會，一向兩校同學隔年睇一次比賽，今年我地作客所以同學要到明年先有得睇嚟。嚟，唔洗諗住識人地學校啲靚仔靚女啦，大家係見唔到嫁啦。

而陸運會就刺激好多，開頭會有歡樂跑，然後係長時間暴曬，最後筋疲力盡。一向陸運會分兩日完成賽事，應該比小學多，而且仲要係一年一度添！陸運會除左比同學起運動場燃燒青春同脂肪之外，看台上都有啦啦隊，分做黑白、藍白、紅白。陸運會會有各級啦啦隊比賽，唔係啦啦隊成員都可以配合佢地嗌口號，一齊為自己嘅社出一分力啦。

另外，陸運會運動場小食部係貴到一個點，而且仲要好麻煩咁樣放低學生證先至可以去，同學若非大富大貴真係唔好買咁多，最好就自備乾糧，慳 d 錢好過啦。

學生會選舉

每年學校都會有學生會選舉，編輯部會介紹學生會選舉嘅流程，以及選舉方式，分為獨立候選人同名單制候選人。經歷過兩年前的編輯部宣傳白票運動的壓力，培英上年已由學校老師提名嘅方式改為公民提名。但係學生會並不能因此成為學生力量的集結，學生會嘅功能仍不能發揮為類似「工會」嘅力量。但無論如何(很正向喔)，同學雖為中一新生，都擁有空間競選，之不過一向不會成功選出。

現時選舉方式分為名單制和獨立候選人，名單制則為 3 人一張，均無上限數量。學生會由 11 位幹事組成，最多會有兩張名單當選，其餘席位為獨立候選人補充。而職位則係由選出的幹事內部分定，會長一職都不是學生公眾選出的，是幹事內部推選。如果參選人員不足 11 人，咁樣就會留會，學生會的優惠服務就會提供唔到。且看今年情況如何吧。

歡迎訂閱!!